

Arkiv	Saksbehandlar	Møtedato	Sak nr.
335.3	Knut Øyjordet	08.02.17	5/17

SØKNAD OM OPPFØRING AV GJETARHYTTE – RUSSDALEN BEITELAG*Saksdokument:*

1. Søknad frå Russdalens beitelag av 20.12.16, sendt til Statskog.
2. E-post frå Statskog av 30.12.16 til fjellstyret.

Saksutgreiing:

Russdalens beitelag søker om oppføring av ei gjetarhytte i Russdalen. I søknaden står det følgjande:

I Russdalen beitelag slipper vi ca. 1.600 sau og lam på beite kvar sommar. Vi har tilsett gjetar heile beitesesongen. Beiteområdet er svært stort og det er svært krevjande å kunne føre tilsyn over alle dyra. Heile beiteområdet er 18 km langt og har eit areal på om lag 100 km². Det seier seg sjølv at det er uråd å kunne dekke heile området på ein dag. I dag nyttar vi gjetarhytta 1,5 km aust for Russvatnet. Den ligg 14 km frå vestgrensa av beiteområdet og 4 km frå austgrensa. Dvs. at det er langt vestover/innover i beiteområdet frå denne hytta. Skal ein komme over heile området i dag, blir det først dårleg tid til å føre eit skikkeleg tilsyn, det blir mest å skunde seg frå ein ende til den andre. I fjar prøvde vi å nytte lavvo lenger inn i beiteområdet slik at det skulle vere råd å dekke området på ein god måte. Lavvoen vart plassert ved Blåtjønnå, men den blåste ned i løpet av beitesesongen. Det er lite aktuelt å prøve dette på nytt.

For å ha eit best mogleg tilsyn ønsker vi no å sette opp ei gjetarhytte ved Blåtjønnå. Denne plasseringa er sentral i beiteområdet og vil gjøre at gjetaren kan utføre tilsynet på ein betre måte enn i dag. Beiteressursane i Russdalen er verdifulle og det er svært gode beiter innerst i beiteområdet vårt, noko vi ser m.a. på slaktevektene på lamma. Det er difor viktig for oss å kunne nytte heile beiteområdet og kunne ha eit godt tilsyn med dyra i beitesesongen.

Gjeterhytte ved Blåtjønnå vil gjøre dette mykje enklare. Vi har sett for oss ei hytte på ca. 15 m².

Vedlagt søknaden følgjer eit kart med tenkt plassering og teikning av hytta. Søknaden vart sendt til Statskog, som har vidaresendt den til fjellstyret. Statskog skriv m.a. i e-posten:

Jmf. seterforskriften § 5 er det fjellstyret som viser ut rett til gjeterhytter etter at Statskog har gitt uttale. Området ved Blåtjønnå ligger i nasjonalpark og en ev. utvisning av tomt må godkjennes av vernemyndigheten. Videre må det søkes kommunen om fradeling og opprettning av punktfeste for tomt til gjeterhytta. Søker må dekke alle kostnader i den forbindelse. For øvrig har ikke Statskog innvendinger til at det kan vises ut tomt for gjeterhytte slik det er søkt om. Vi forutsetter at videre behandling foretas av fjellstyret og vernemyndigheten. Om utvisning foretas og godkjennes av vernemyndigheten vil vi som grunneier søke kommunen om fradeling av punktfeste.

Vurdering:

Pga. dei store avstandane i beiteområdet, er det forståeleg med eit behov for ei bu lenger inn i Russdalen, som eit tillegg til gjetarbu framafor Russvassosen ("Saubue"). Ei lita gjetarbu skulle heller ikkje bli noko stort skjemmande element i landskapet her. Det er to buer inst i Russdalen frå før, dvs. ei bu på Sundodden som eigaren av Russvatnet har, og ei bu lenger vest som Lom tamreinlag eig. Fjellstyret bør difor vera positiv til søknaden. Det vil vera naturleg å setje vilkår om at bua må fjernast dersom beitelaget blir opphøyrt og/eller det ikkje vil vera behov for bua lenger. Det bør elles bli vist til vilkår i standardskjema til Statskog (utvisingsforretning gjetarbu), der det m.a. står at bua skal vera tilgjengeleg for fjelloppsynet.

Innstilling til vedtak:

I medhald av § 5 i Forskrift om seter og tilleggsjord m.m. i statsallmenningane, får Russdalen beitelag løyve til å setje opp ei gjetarhytte på ca. 15 m² aust for Blåtjønnåe slik som omsøkt.

Fjellstyret set som vilkår at endeleg plass for tomt må skje på ei synfaring, der aktuelle instansar deltek. Dersom gjetarhytta blir bygd og det viser seg ein gong i framtida at det ikkje vil vera behov for bua lenger, så skal bua rivast. Det blir elles vist til vilkår i Statskog sitt standardskjema i utvisingsforretning gjetarbu. Sidan planlagt tomt ligg innanfor nasjonalparken må det også innhentast løyve frå nasjonalparkstyret, samt byggjeløyve frå kommunen.

Vedtak:

Samrøystes: Som innstillinga.

Rett utskrift. Går til:

Russdalen beitelag v/Anders Strand
Statskog v/Trond Berger
Nasjonalparkstyret v/Kari Sveen

Vågåmo, 08.02.17

Knut Øyjordet (e.f)

Adresse	Telefon	Bankgiro	E-post
Postboks 16 2684 VÅGÅ	61 29 37 37	2085.25.13625	vaga@fjellstyrene.no